

ԳՐԱԽՈՍՈՒԹՅՈՒՆ ԵՎ ՔՆՆԱԴԱՏՈՒԹՅՈՒՆ

Ռ. ԶԱՐՅԱՆ «ՍԻՐԱՆՈՒՅՇ»

«...Ի՞նչ է բեմի արտիստը, լինի նա զրամատիկական դերասան, երգիչ թե նվագիչ, եթե ոչ միօրյա ծաղիկ, որ առավոտը ընկնելով, երեկոյան թառամում է արեգակի վերջին ճառագայթների հետ: Աղամյանը գերմարդկային ճիգ էր գործ դնում, որպեսզի կարողանա գրչով կամ վրձինով մի բան ստեղծել: Եվ երբ ես հարցնում էի նրան.

— Ի՞նչ կարիք ունիս նկարչի անուն վաստակելու, քանի որ, իբրև բեմական արտիստ անգուզական ես:

Նա պատասխանում էր դառն թախիծով.

— Ո՞վ կարող է իմ մասին պատմել ապագա սերնդին, եթե ոչ ժերունիների թառամած հիշողությունը: Ես փափագում եմ ունենալ մի վկայագիր ապագայի համար, — ավելացնում էր նա, ձեռով զարկելով իր ձեռագիր վիպակների և ոտանավորների տետրին կամ յուր նկարներին, որոնք սակայն միջակությունից բարձր չէին»<sup>1</sup>:

Հայ վիպասանի այս տողերը ցույց են տալիս, թե որքան յուրօրինակ է դերասանի ստեղծագործությունը: Դերասանի արվեստը, եթե կարելի է այսպես ասել, անցողիկ ճակատագիր ունի: Այս տեսակետից բեմի անցյալի վարպետների ստեղծագործական դիմանկարի վերակենդանացումը պահանջում է մասնագիտական մեծ հմտություն: Ահա այդ հատկանիշի դրսևորումը Ռ. Զարյանի «Սիրանույշ» մենագրության մեջ դարձնում է այն մեծ արտիստուհու հարազատ նկարագիրը:

Ռ. Զարյանը չի տեսել Սիրանույշի խաղը բեմում: Իր ուսումնասիրությունները հեղինակը կատարել է հենվելով «պարբերական մամուլի էջերում պահպանված ռեցենզիաների, նամակագրության, մեմուարային գրականության, դերասանուհու խաղընկերների ու հանդիսատեսների հետ ունեցած զրույցների հիման վրա»<sup>2</sup>:

Ռ. Զարյանը ստեղծել է հայ բեմի անգուզական դերասանուհու բեմական գործունեության ամբողջ ընթացքը պատկերող մի գործ: Հեղինակը Սիրանույշի խաղի մասին տարբեր ռեցենզիաներում ցրված դիտողությունների, երբեմն, բառիս բուն նշանակությամբ, պատահիկների հիման վրա երևակայության և տրամաբանության ուժով վերականգնում է մեծ դերասանուհու այս կամ այն դերակատարումը և Ռ. Զարյանը այդ կատարում է այնքան հաջող, որ Սիրանույշին տեսնողները հաստատում են մենագրության հեղինակի ճշմարտացի լինելը (տե՛ս պրոֆ. Լ. Քալանթար, «Առաջաբանի փոխարեն»):

Հաճախ Ռ. Զարյանը Սիրանույշի խաղը մեկնաբանում և նկարագրում է այնքան պատկերավոր, որ մեծ դերասանուհու ստեղծած տվյալ կերպարն ընթերցողի առջև կանգնում է իր ամբողջ մոնումենտալությամբ: Այս առումով բնորոշ է Սիրանույշի ստեղծագործության գագաթնակետի՝ Մեղեայի նկարագրությունը: Ոչ մի դերակատարում Սիրանույշին չի բերել այնպիսի հռչակ, ինչպես Մեղեան, որին մարմնավորելու համար դերասանուհին պետք է ողբերգական լայն շունչ ունենա: Կրքերի ահագնությամբ, իր կենցաղի արժանապատվության համար մաքառող, ոտնակոխ արված պատվի համար դաժանորեն վրեժխնդիր լինող Մեղեայի դերում հանդես գալը դերասանուհուց պահանջում է ուժերի մաքսիմում լարում, դերասանական արվեստի բարձր տվյալներ: Պատահական չէ այն հանգամանքը, որ հայ դերասանուհիներից շատ քչերն են հանդես եկել այդ դերում, չնայած հայ բեմը քիչ տաղանդավոր դերասանուհիներ չի ունեցել: Եվ դա հասկանալի է, որովհետև «Մեղեան», — գրում է Ռ. Զարյանը, — բարդ-հակասական կերպար է, հոգեկան փոթորկումներով լի, և պահանջում է ոչ միայն անհատականության բազմակողմանիություն, այլև մեծ թափ, հուժկու խառնվածք: Այդ դերի կատարումը ժամանակակիցները համարել

\* Ռ. Զարյան, Սիրանույշ, Հայկական ՍՍՌ ԳԱ Հրատարակչություն, Երևան, էջ 346:

<sup>1</sup> Շիրվանզադե, Երկերի լիակատար ժողովածու, հ. 9, էջ 276—277:

<sup>2</sup> Ռ. Զարյան, Սիրանույշ, 1956, էջ 13:

են պարզապես «մարդկային ուժերից վեր»։ Եվ այդ «ուժերը» ունեցել է Սիրանուշը ու Մեղեա խաղալով անէացրել, հափշտակել և արվեստի կատարելիութամբ զարմանք պատճառել հանդիսատեսին։

Մենագրության հեղինակը փորձել է պարզել Սիրանուշի արվեստի ընդհանուր նկարագիրը, բացահայտել նրա ստեղծագործության ոճը։ Այդ բանին հասնելու համար Ռ. Ջարյանը վերլուծել է Սիրանուշի ստեղծագործած գրեթե բոլոր կերպարները և հանգել այն ճիշտ եզրակացության, որ այդ կերպարները միմյանց հետ ունեն ներքին կապ և պայմանավորում են մեկը մյուսին։ Հետազոտելով այն դերերի ցանկը, որոնք Սիրանուշը խաղացել է սկսած 1891 և հատկապես 1897 թ. հետո և առաջացրել ընդհանուր հիացում, Ռ. Ջարյանը գտնում է. որ Սիրանուշի հաջողությունները այդ շրջանում ոչ միայն տաղանդի զարգացման ու ամրապնդման արդյունք են, այլև ստեղծագործական անհատականություն ձեռք բերելու, ինքնորոշման արդյունք. դերասանուհին գտնում է իր թեման՝ անհատի ազատությունը, որ մարմնավորել է կնոջ իրավագուրկ վիճակի պատկերումով։ Այստեղից հետևում է, որ Սիրանուշի արվեստի ծաղկումը նաև ժամանակի հասարակական-քաղաքական խմորումների արդյունք է։ «Մենք բնավ էլ պատահական չենք համարում,— գրում է Ռ. Ջարյանը,— որ Սիրանուշի գործունեության ամենածաղկուն և ամենարժեքավոր շրջանը համընկնում է ուղղակիորեն վերելքին։ Ոչ միայն պատահական չէ, այլև կարելի է ասել, որ Սիրանուշի գործունեության մեջ այս շրջանում շատ բան պայմանավորված է ուղղակիորեն դարաշրջանով...»

...Սիրանուշը չէր տեսնում ազատության ոեալ ճանապարհ, բայց ձգտում էր դրան իր ստեղծագործությամբ ազատության կոչ եր անում։ Նա չգիտեր, թե ինչպես պետք է պայքարել այդ ազատության համար, բայց ստելություն էր բորբոքում ճնշման ու բռնության դեմ, ընդդեմ ճահճացման, չնչինության, ստորաքարշության։ Նա մեծարում էր բանականությունը, խիղճը, մարդկայնությունը, հոգու թռիչքը, մտքի սլացումը։ Նա չգիտեր թե ե՛րբ և ի՛նչպես է գալու իր երազած ապագան, բայց իր ստեղծագործությամբ ժողովրդի մեջ վառ էր պահում հավատը, այն համոզումը, որ կգա մի օր, երբ մարդիկ իսկապես ազատ կլինեն։

Անձի ազատության գաղափարը հանդիսատեսին հաղորդելու համար Սիրանուշը հաճախ ընտրել է թույլ, զեղարվեստական տեսակետից աննշան պիեսներ։ Եվ այս վերջին հանգամանքի վրա, ըստ երևույթին, Սիրանուշը այնքան էլ ուշադրություն չի գործարել։ Դրամատուրգիական չնչին նյութն էլ Սիրանուշի խաղով կյանք է ստացել, հուզել է հանդիսատեսին։ Այս կապակցությամբ Ռ. Ջարյանը առաջ է քաշել թույլ պիեսի լավ կատարման հարցը և Սիրանուշի օրինակով ճիշտ մեկնարանել այն։ Սիրանուշի ռեպերտուարում բարձրարժեք, կլասիկ դրամատուրգիայի կողքին տեղ են գրավել շատ պիեսներ, որոնք այժմ հնազիտության սեփականությունն են դարձել։ Այս վերջիններում Սիրանուշի ընտրած դերերը նրա կատարմամբ վեր են ածվել արվեստի խոշոր ստեղծագործությունների։ Եվ դա զարմանալի չէ։ Եթե արվեստի մի մեծ կոթող, ասենք «Համլետ», ապա շնորհ դերասանի կատարմամբ կարող է աննշան մի գործ դառնալ, ապա ինչո՞ւ հանճարեղ ստեղծագործողի շնորհիվ մի որևէ մեկը դրամա չի կարող հասնել ողբերգության աստիճանին։ Նման ստեղծագործողներ թատրոնի պատմությունը տվել է. հիշենք Մոչալովին, Շչեպկինին, Ֆեդոտովային, Երմոլովային։ Սիրանուշը եղել է Երմոլովայի նման արվեստագիտուհի և նրանց ռեպերտուարը չնչին բացառությամբ համընկել է։

Սիրանուշը, ժամանակին, որոշ քննադատների կողմից նմանեցվել է համաշխարհային հուշակ վայելող մի շարք դերասանուհիների։ Ռ. Ջարյանը վիճարկելով նման կարծիքները փաստերի և ճիշտ եզրակացությունների հիման վրա ապացուցում է, որ հայ մեծ դերասանուհին և ոչ մեկի էպիգոնը չի եղել, այլ ունեցել է իր ստեղծագործական անհատականությունը և ոչ մեկին չի նմանվել։ Մենագրության հեղինակը Սառա Բեռնար-Համլետի և Սիրանուշ-Համլետի զուգարկումով ապացուցում է, որ այստեղ միայն գոյություն ունի արտաքին նմանություն այնքանով, որքանով որ երկուսն էլ կին են, բայց նրանց մոտեցումը այդ կերպարին, նրանց մեկնարանությունը խիստ տարբեր է եղել։

«Սիրանուշ» մենագրությամբ Ռ. Ջարյանը հիմք է դնում սիրանուշագիտությանը, որը հայ թատերագիտության խոշոր բացերից մեկն է։

Մենագրության հեղինակը նկարագրելով Մերոպե Գանթարճյանի, հետագայում Սիրանուշի կյանքը և գործը, ընտրում է այնպիսի մանրամասներ, որոնք բնորոշ են եղել մեծանուն դերասանուհուն։ Ըստ կանաչափ հետաքրքրական է այն փաստը, որ Սիրանուշը

Թատրոնով հափշտակվել է շատ վաղ հասակից, նույնիսկ մինչև դպրոց հաճախելը: Այս հանգամանքը, չնայած օրինաչափական չէ, բայց կարծես թե հատկանշական է մեծ արվեստագետի համար, հատկանշական թեկուզ այն պատճառով, որ եթե չլիներ այդ անհուն սերը դեպի բեմը, հազիվ թե հնարավոր լինել ճեղքել թատրոնի և հատկապես դերասանուհու նկատմամբ գոյություն ունեցող նահապետական միջավայրի նախապաշարումների այն հաստ շերտը, որով շրջապատված է եղել Սիրանուշը:

Ռ. Ջարյանը Սիրանուշին չի կտրել իր միջավայրից. Գրքում բավականաչափ տեղ է հատկացված Սիրանուշի բեմական ուղու պատմությանը, որ հեղինակը նկարագրում է ժամանակի հասարակական-բաղաբական, բնտանեկան, ստեղծագործական միջավայրի ֆոնի վրա: Այս իսկ պատճառով ընթերցողը շատ լավ պատկերացնում է այն էվոլյուցիան, որ ապրել է Սիրանուշը սկսած բնտանեկան ներկայացումներից մինչև Մաղաբյանի և Վարդովյանի թատրոնը և այնուհետև մինչև մեծ արվեստագիտուհու հռչակը:

Մենագրությունը ավելի շահած կլիներ, եթե հեղինակը որոշ շափով կրճատեր մեջբերումները: Չնայած հեղինակը մեջբերումներին դիմել է դիտավորյալ կերպով «Սիրանուշի ժամանակակիցներին ձայն տալու» համար, այդուհանդերձ մենք կարծում ենք, որ որոշ մեջբերումների վերապատմումը ավելի լավ տպավորություն կստեղծեր ընթերցողների մոտ, մանավանդ, երբ հեղինակը նկարագրելու նախանձելի կարողություն ունի:

Սիրանուշի արվեստը հասել է այնպիսի բարձրության, որ իրավունք է տալիս մեծ արվեստագիտուհուն դասելու համաշխարհային մեծությունների շարքը: Նրա անզուգական խաղը, տաղանդի հզոր փայլատակումները տասնյակ տարիներ հափշտակել են հանդիսատեսներին, ալեկոծել նրանց սիրտը: Այսօր, երբ լրանում է Սիրանուշի ծննդյան 100-ամյակը, և երբ նրա ստեղծագործությունը ներկա սերնդի համար դարձել է անցյալի մի գեղեցիկ հուշ, Ռ. Ջարյանի «Սիրանուշ» արժեքավոր մենագրության լույս ընծայումը միանգամայն ժամանակին է:

Տ. ԿԱՐԱՊԵՏՅԱՆ.

